

Sarajevo, 06.06.2022. godine

Skupština Kantona Sarajevo

Admela Hodžić, samostalna zastupnica u Skupštini Kantona Sarajevo

KANTON SARAJEVO

SKUPŠTINA KANTONA SARAJEVO

VLADA KANTONA SARAJEVO

ZASTUPNIČKA INICIJATIVA

Na osnovu čl. 106. i 213. Poslovnika Skupštine Kantona Sarajevo („Službene novine Kantona Sarajevo“, broj 41/12 - drugi novi prečišćeni tekst, 15/13, 47/13, 47/15, 48/16, 9/20, 14/20 i 16/22) podnosim inicijativu Vladi Kantona Sarajevo da u narednom periodu, odnosno za svaki zaključen ugovor svih ministarstava, kantonalnih institucija i javnih preduzeća obezbijedi puna transparentnost i dostupnost podataka koji podliježu tretmanu načela transparentnosti i javnosti. Također i kvartalno izvještavanje o fizičkom napretku postignutog u implementaciji projekata do određenog dana tokom cijelog perioda realizacije, stvarne ili očekivane poteškoće ili odlaganja u implementaciji projekata i njihov utjecaj na plan implementacije, te konkretne korake poduzete ili planirane da bi se prevazišle poteškoće i izbjegla odlaganja, očekivane ili neočekivane promjene datuma završetka projekata, ključne kadrovske promjene osoblja projektnih entiteta, PIU-a (Jedinica za implementaciju projekta), konsultanata ili izvođača, pitanja koja mogu utjecati na troškove projekata i svaki događaj ili aktivnost koja može štetno djelovati na ekonomsku održivost bilo kojeg dijela projekata. Inicijativom tražim i dostavljanje finansijskih izvještaja koji pokazuju detaljne izdatke nastale po svakom dijelu projekata i povlačenja sredstava po zajmovima, zajedno sa izvještajima koji pokazuju: originalne predviđene troškove, revidirane predviđene i nepredviđene troškove, ako ih ima, sa razlozima promjena, predviđene i stvarne izdatke do određenog datuma, razloge odstupanja stvarnih izdataka od predviđenih izdataka do određenog datuma i procjene izdataka za preostale kvartale te godine. Kratki pregled o statusu poštivanja svih obaveza sadržanih u ugovoru o kojem se izvještava.

OBRAZLOŽENJE

Pokrećem inicijativu kojom bi se obavezala Vlada KS da donese Uredbu ili predloži zakonsko rješenje kojim ugovori koje potpisuje Vlada KS ili ministarstva u Vladi KS neće imati bilo kakvu oznaku tajnosti ili povjerljivosti.

Razlog za podnošenje ove inicijative su nejasnoće oko potpisanog ugovora sa kineskim konzorcijem na obnovi tramvajske pruge u Sarajevu. Smatram da dato obrazloženje resornog ministra o, citiram: "povrijedili bismo zakone, prekršili sudske propise čime bismo oštetili građane" nije adekvatno i mislim da se upravo neobjavljivanje detalja ugovora oštećuju građani KS jer čitav posao zbog svoje netransparentnosti baca sumnju da se novci građana troše na način protivan upravo zakonima ove države. Smatram da ćemo putem Uredbe ili zakona pomoći i Vladi KS i nadležnim ministarstvima da prilikom objave tendera jedna od baznih odredbi bude transparentnost i javnost zaključenih ugovora. Novac građana i pravna procedura utroška tog novca u svakom trenutku trebaju biti pod lupom javnosti, a ne da se ponuđači ili konzorciji štite preko odredbi povjerljivosti ili tajnosti.

Građani su najviše oštećeni ako u cijelom poslu izostaje transparentnost prilikom zaključenja posla u odredbama ugovora, a u slučaju bilo kakvih sumnji u isto, ne mogu biti informisani tj. da im se podmeću floskule o kršenju "sudskih propisa" umjesto jasnih i kratkih odgovora na bilo kakvu sumnju u procesu nabavki i zaključenja ugovora.

Uredba ili zakon o transparentnosti i javnosti zaključenja ugovora u Vladi KS ili njenim ministarstvima ne treba biti obiman dokument već samo kratka pravna osnova za ove procese gdje ćemo ukinuti bilo kakve dijelove ugovora tajnim ili polutajnim, a ponuđače obavezati da učešćem na tenderima i zaključenim ugovorima nemaju pravo štititi se odredbama tajnosti jer se radi o javnom novcu i zaštiti zakonitosti utroška javnog novca.

Izveštavanje o toku i realizaciji ugovora tražimo iz razloga što sličan član ugovora stoji u ugovorima EBRD-a kao strane koja obezbjeđuje kreditna sredstva, te stoga smatramo da istu vrstu informacija i kontrole treba da ima najviši zakonodavni organ koji donosi odluke i koji je garant za vraćanje sredstava kredita.

Do pune transparentnosti u svim postupcima nabavki, a posebno onim koji se finansiraju kreditnim sredstvima (zaduživanjem u ime građana) podnosimo ovu inicijativu i tražimo realizaciju iste od Vlade KS u što kraćem roku.

Admela Hodžić